

Regional News Unit AIR Aizawl
Saturday, January 03, 2026

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Krismas leh Kum Thar hlim taka hman a nih hnuah, vawiin atang khan Aizawl khawpui chuan nunphung pangngai a zawh leh tan ta.
- Kum hlui thlah zan khan Aizawl khawpui-ah halpuah, halmawi leh meithallawn an hal nasa hle a, mahse, boruak a nghawng dan hriat theih a ni lo.
- Food Corporation of India (FCI) chhinchhiah danin Mizoram chhungah kudam, a vai a belhkhawm a buhfai metric tonne 31,842 dah khawl theihna a awm mek.
- India sorkar chuan Ministry of Textile hnuai a Production Linked Incentive (PLI) scheme dilna thar thehluh hun chu kumin march ni 31 thleng a pawhsei thu a puang.

<><><>

NORMAL LIFE RESUMES

Krismas leh Kum Thar hlim taka hman a nih hnuah, vawiin atang khan Aizawl khawpui chuan nunphung pangngai a zawh tan leh ta a.

Zing kar atangin dawr inhawng hmuh tur an tam nghal a, a bik takin eitur zuar dawr a inhawng hma hle a, bungrua leh thawmhnaw zuar dawrte pawh an inhawng tan ve leh nghal bawk.

Kawngpui sirah chawhmeh leh thil dang zuar an inpho chhuak bawk a, nikum Krismas dawn hnai boruak ang kha ni rih lo mah se, inchhung mamawh lei tuma chhuak an awm leh nghl, kawng sira thingpui zuarte pawhin an hna ngai an thawk leh tan a ni.

Thalai inswizawi tura khelmual pan hmuh tur an awm nual a, kawngpui dungah nu leh pa, ku m upa lam deuh tawh taksa sawizawi a chhuak hmuh tur tam tak an awm bawk a ni.

Naktuk hi kumina Pathianni hmasa ber a nih avangin kohhran hrang hrangte chuan Sundes Sikul hming ziah ni atan an hmang ang a, karleh Thawhtanni atang chuan sorkar leh mimal Pisa te pawh a pangngai a chhunzawm a ni leh tawh ang.

<><><>

AIZAWL AQI

Kum hlui thlah zan khan Aizawl khawpui-ah halpuah, halmawi leh meithallawn an hal nasa hle a, mahse, boruak a nghawng dan hriat theih a ni lo.

Mizoram Pollution Control Board (MPCB) hotute Akashvani Aizawl news-in a be pawp a. Hemi zan dar 11 leh a chanve leh dar 12 leh a chanve inkar a Aizawl khawpui boruak chhiat leh that dan a zawhna chu an chhang thei lova, an khawl a chhiat vang a nih thu an sawi. MPCB member secretary Pu C. Lalduhawma’n a sawi danin an khawl hi central server lam chhia nge tih an en chiang mek a, a lo inchhinchhiah dan a hmuh leh theih em tih an la hre rih lo a ni. He tih lai hian Aizawl a India Meteorological Department (IMD) hotute chuan January ni 1, chawhnu dar 4 khan Aizawl a Air Quality Index (AQI) chu 45 niin a tha-ah an ngai a. A hma zan lai AQI erawh chu an sawi thei lo thung a ni.

Krismas urlawk zan khan Aizawl khawpui chhungah halpuah leh a behbawm hal a awm meuh loh avangin zan lai dar 12 leh minute 5 khan Sikulpuikawn a AQI chu 38 niin MPCB khawl chuan a chhinchhiah a ni.

<><><>

MURDER SUSPECT ARREST

Kum hlui thlah zana Lunglei a Pi K. Vanlalngaii Kum 78 tualthih chungchangah a thattu ni ngei a rin chu Police-te’n an man.

He tualthihna-ah hian tualthattu hian hnuhma a hnutchhiah tlem hle chungin a chhuitu Police special investigation team (SIT) hian he thilthleng hi darkar 24 chhungin an chhui chhuak hman a. Lunglei district SP Pu J. Lalmuankima’n Akashvani Aizawl news a hrilh danin Pi K. Vanlalngaii thattu ni a rin Johny Rosangliana (41), Lunglei Bazar veng a cheng hi ruihhlo ngai a ni a. Tunhma-in Police in a lakah thubuai an la ziaak lut lo ni a hriat a ni a. A thah chhan tak hi hriat chian a la ni lo chungin Pi Ngaii hi rawk tumin a luh chilh a, he tah hian kut a thlakna lamah a that ta mai ni a hriat a ni a. Johny Rosangliana hian Pi Ngaii hi a thah ngei a nih thu a inpuang tawh niin Police-te chuan an sawi a ni. Tualthattu a puh hi vawiin khan Lunglei district court-ah hruai a ni a, court thupek angin jusicial custody a hlanin Lunglei district jail-ah dahluh nghal a ni.

Lunglei district SP chuan nimin khan chanchinbumite hnenah hemi chungchang hi a sawifiah a. A chenna ina Pi K. Vanlalngaii ruang hmuh a nih thu hi kum hlui thlah zar dar 9 leh a chanve vel khan Lunglei Police Station-a thawkte chuan phone hmangin an dawng a. A hmunah thleng nghalin tihtur tulte an ti nghal a. Pi K. Vanlalngaii ruang hi chhuatah tlu-in a lu chu thutphah sei-ah a innghat a. Forensic team pawh koh niin a thih dan hi mi kut tuar ni ngei a a lan avangin a finfiahna awm thei ang angte dap a chhui a ni a.

SP ruahmanna-in a chhui bik tur SIT din a ni a. Pawikhawihtu hian hnuhma engmah a hnutchhiah mumal loh avangin harsa taka chhui zui a ni a. He ti chung hian Ningani zan dar 9 khan pawikhawihtu ni a rinhlelh Johny Rosangliana hi man a ni ta a. Thu zawh fiah a nih lai-in ama tih ngei a ni tih a inpuang ta niin SP chuan a sawi a ni.

He thil hi chhui zui mek zel a ni a, pawikhawihtu hi a an rinhlelh man hi a ni ngei a ni tih court lama finfiahna tur lakkhawm mek a ni a. Hemi hma hian Pi K. Vanlalngaii hi tualthi ngei ni a ngai-in Bharatiya Nyaya Sanhita (BNS) section 103(1) tlawhchhanin Lunglei Police Station-ah nimin khan thubuai ziah luh a lo ni tawh a ni.



FCI WAREHOUSE

Food Corporation of India (FCI) chhinchhiah danin Mizoram chhungah kudam, a vai a belhkhawm a buhfai metric tonne 31,842 dah khawl theihna a awm mek.

FCI hotuten Akashvani News Aizawl an hrilh danin, an kudam zingah hian Bairabi leh Kolasib-a an kudam chu a lian bera a, Bairabi leh Kolasib-a FCI kudam-ah hian buhfai metric tonne 6,264 ve ve a dah khawl theih a. Aizawl leh Bualpui kudam in dawt lehin, heng kudam pahnihah te hian buhfai metric tonne 5,742 a leng ve ve a, heng bakah hian Lawngtlai kudam-ah bufai metric tonn 4,176 bakah Lunglei kudam-ah buhfai metric tonn 3,654 a dah khawl theih bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



CHEPA LEMCHAN AT DARZO VILLAGE

Hnahthial District-a Darzo khawtlang chuan kum tin a an lo tih thin angin Kumthar ruai theh ni-ah, Kumthar lawmna chikhat atana ‘Chepa Lemchan’ an entir thin chu kuminah pawh an entir leh a. Hemi pual hian “Chepalem Bawm” khaiin mi harsate tan vehbur khawn a ni.

Darzo Branch YMA President Pu Hmingthanzuala sawi dan in, Darzo Chepa lemchan hi kum 1927 atang khan pi leh pu ten kumthar lawm nan kum kalta chhunga lusun khawhar leh nu nau te tihhlimna nipah fawmin patlingte leh tlangval ten Chepa lem hi an chang thin a. Tun hnuah erawh chuan nula leh tlangval leh naupangten an chang tawh niin a sawi. Kumin hi an kum 99- na a ni a, nakkum 2027-ah he hun hi an la hman thei a nih chuan kum 100 an hmanna tur a ni dawn a, Mizoram mipui tam zawk in an chhim theih tur khawp a ropui zawk a hman an tum thu a sawi bawk a ni.



CHAMPHAI HOSPITAL REPORT

Kum thar vuakvetah nimin thleng khan chhinchhiah theih chinah, District Hospital Champhai-ah leh Private Hospital dangah te casualty case 40 neiin, heng zinga case 5 te chu accident an ni a.

Zu avanga casualty pan hi mi 4 a awm a, mi 10 an admit bawk a ni. Hriat theih chinah nJanuary ni 1 leh ni 2 chhungin Hospital-ah mitthi an awm lo a ni.

<><><>

PLI

India sorkar chuan Ministry of Textile hnuai a Productionom Linked Incentive (PLI) scheme dilna thar thehluh hun chu kumin march ni 31 thleng a pawhsei thu a puang.

Ministry of Texlite chuan Nikum August thlaa dilna an hawn leh hnu ah diltu an thahnem tak avang apawtsei a nih thu an sawi a, textile company te hnen atangin rawtna hi an thehluh a ni. Sorkar chuan India ram chhunga hemi lam a thawktute ah rinna leh beiseina a nei nasa hle a, diltu hna pek te tan hun pek belh a nih theih nan rawtna an thlen bawk.

<><><>